



EXPRESS op Kölsch

Montag, 29. Februar 2016


Rolly & Stephan Brings: Vörbild sin es nit leich



**Dä Son om Aazstohl es ärch bang.
Dä Zantaaz wink allt met d'r Zang.**




**Dä Vatter säät: „Ich maach et vör.
T'es halv su schlemm, Son. Jläuv et meer!**



**Pass jot op, wat jetz passeet!“
Dä Son e Stöck op Affstand jeit.**



**Dä Va rieß op janz brav sing Schnüss,
denn en d'r Schnüss setz et Jebess.**



Dä Zantaaz loort im en die Muul
un sprich: „Ör Backzäng, Meister, sin all fuul!“



Dä Zantaaz zeich dem Pap die Zang;
dä setz om Aazstohl un es bang.

© Bilder: e. o. plauen
© Text: Rolly & Stephan Brings

Vatter **Rolly** un Son **Stephan** han zesamme e Boch jeschrevve.
Nit op Huhdütsch, nit op Englisch – ävver **op Kölsch**.
Un wat för e Boch han se jeschrevve?
Ne Krimi? Nä, Köln-Krimis jitt et allt jenoch.
Do bruch mer nor d'r **EXPRESS** ze lese, dä brengk jeden Dach ne
Köln-Krimi.
Die Zwei han e Bilderboch met kölsche Texte jeschrevve.
Sujet nennt mer **Comic**.
Wä hät die Bilder jemaat?
Die hät ne janz beröhmpete Zeichner jemaat.
Dä nannt sich **e. o. plauen**.
Ävver die Comics udder Cartoons, die hä vör üvver 80 Johre
jezeichnet hät, hatte kein Wöder:
Se wore ohne Text – un trotzdem kunnt jeder, ejal ov jung udder
alt, se verstönn.
Rolly kennt die **Vatter un Son-Jeschichte** vun **e. o. plauen** zick
singer Kindheit; och **Stephan** kennt se, zick hä sich erennere kann.
Un su han se sich zesammejesatz un üvver 50 Vatter un Son-
Jeschichte op Kölsch verzallt.

Nit einfach nor verzallt – nä, op Kölsch jereimp, su wie anno Pief **Wilhelm Busch** sing Bilderjeschichte vun **Max un Moritz** met Reime versin hät.

Nä, han die Zwei ne Spaß dobei jehat!

Besonders bei dä Jeschichte, die mer he em **EXPRESS op Kölsch** sin kann:

Vatter **Rolly** moot ens noh'm Zantaaz jonn, un weil **Peter** un **Maria** krank doheim em Bettche loge un vun d'r Mamm versorch woote, nohm **Rolly** singe kleine **Stephan** met en die Zantaazpraxis.

Jääن hät d'r **Rolly** dat nit jedonn, denn bei allem, wat met Zäng un Zantaaz ze dun hät, wor un es hä och hück noch ne Bangendresser. Un wie hä su op dem Stohl soß, leef im d'r Angsschweiß d'r Rögge eraff. **Stephan** soß och em Behandlungszemmer op nem Stöhlche un hät jemerkt, dat singe Pap keine Held wor – hät ävver als kleine Gentleman nixjesaat.

Trotzdem hät **Papa Rolly** sich e bessje vör singem **Son jeschammp**.

Hück künne se beids drüvver laache.

Domet och alle **Imis** die Vatter un Son-Jeschichte verstönn künne, han **Rolly** un **Stephan** se och noch en et Huhdütsche üvversatz.

D'r **J. P. Bachem Verlag** weed dat Boch em **September 2016** rusbrenge.

Ävver dat Boch weed et och als **E-Book** jevve.

Doför wääde **Rolly** un **Stephan** die Vatter un Son-Jeschichte **op Kölsch** lese – un ne Song von inne kammer och höre.